

GOJRI NEWS BULLETIN

23DEC 2025

1700 HRS

ایوننگ گوجری نیوز بولٹین 23 دسمبر 2025

یوہ آکاشوانی جموں ہے نصرت چودھری تے اظہر حسین تیں خبر سُنو۔

HEADLINES

- ۱۔ وزارتی اجلاس نے سیلاب تیں متاثرہ لوکاں واسطے 5 مرلہ زمین تے گراں سطح گا کارگناں غی تنخواہ بدھان غی تجاویز منظور کرلی ہے۔
- ۲۔ ملک بھر مانہ کساناں غو قومی دن منایو جارہیو ہے وزیر اعظم نریندر مودی نے بھارت رتن چودھری چرن سنگھ نانہ اُن غا جنم تہاڑہ ور خراج عقیدت پیش کیو۔
- ۳۔ وزیر برائے زراعت جاوید احمد ڈار نے سانہ مانہ کسان میلہ غو افتتاح کیو۔
- ۴۔ وزیر برائے جل شکتی جاوید احمد رانا نے پونچھ واسطے شمسی توانائی غی پیداوار غا امکانات غو جائزولیو۔
- ۵۔ محکمہ موسمیات نے جموں صوبہ غا میدانی علاقاں مانہ آن آلاں 7 تہاڑاں مانہ درمیانہ درجہ توں گنی تھند بارے جانکاری دتی ہے۔

CABINET MEET

سوموار نانہ وزارتی اجلاس نے 5 مرلہ زمین مختص غی پالیسی غی منظوری دتی جھپڑی سیلاب تیں متاثرہ لوکاں واسطے وے غی، تے گراں سطح غا کارگناں غی تنخواہاں مانہ وی اضافو منظور کیو گیو۔ آکاشوانی جموں غا نمائندہ غے مطابق یوہ اجلاس وزیر اعلیٰ عمر عبداللہ غی صدارت مانہ ہوو، جس مانہ تمام وزراء نے شرکت کی تے مختلف محکماں غی طرفوں جمع کرائی گئی کئی تجاویز وی منظور کیا گیا۔ وزارتی اجلاس نے اس سال پہلاں بادل پھٹن تے سیلاب تیں متاثرہ لوکاں واسطے 5 مرلہ زمین مختص کرن غی تجویز نانہ منظور کیو۔ اس تیں علاوہ وزارتی اجلاس نے گراں سطح غا کارگناں تے ملٹی پریز کارگناں غی تنخواہ سطح 2 تیں سطح 4 توڑی بدھان غی تجویز وی منظور کرلی، وزارتی اجلاس غی منظوری تیں بعد یاه تجویز ہُن لیفٹیننٹ گورنر غی منظوری واسطے جے غی۔

NATIONAL FARMERS DAY

اج پورا ملک مانہ قومی کسان غو تہاڑو منایو جارہیو ہے یوہ تہاڑو ملک غی ترقی تے خوشحالی مانہ کساناں گا اہم کردار نانہ خراج تحسین پیش کرن واسطے منایو جے۔ یوہ تہاڑو سابق وزیر اعظم چودھری چرن سنگھ غی یوم پیدائش غا طور ور وی منایو جے۔ اس موقع ور کساناں غی انتھک محنت تے لگن نانہ سہرايو جے، تے ملک غی تعمیر مانہ اُن غا بُنیادی کردار نانہ تسلیم کیو جے۔ وزیر اعظم نریندر مودی نے چودھری چرن سنگھ نانہ ان غا یوم پیدائش ور خراج عقیدت پیش کیو۔ ایک سماجی پوسٹ مانہ وزیر اعظم نے کہیو کہ چودھری چرن سنگھ نے اپنی پوری زندگی سماج غا محروم طبقاں غی فلاح و بہبود تے کساناں غی خوشحالی واسطے وقف کردتو تھو۔

KISAN MELA SAMBA

قومی کسان تہاڑا، غا موقع ور ضلع سانہ غی انتظامیہ نے کسان میلہ غو اہتمام کیو، اس میلہ غو موضوع تھو، قوم نانہ خوراک، مہیا کرن آلا ہتھاں نانہ احترام، جہیڑو رانی سوچیت سنگھ سٹیڈیم سانہ مانہ منعقد کیو گیو، میلہ غو افتتاح وزیر زراعت جاوید احمد ڈار نے کیو۔ میلہ مانہ زراعت تیں متعلق اوزار، زرعی مصنوعات تے مختلف سبزیں غا اسٹال لایا گیا، جن مانہ نوی تکنیک، روایات تے کسانان غی محنت نانہ اُجاگر کیو گیو۔ وزیر زراعت نے اسٹالان گو دورو لایو، تے نمائش مانہ رکھیا گیا سامان غو معائنو کیو۔ میلہ مانہ مختلف فنکاران غی طرفوں ثقافتی پروگرام پیش کیا گیا۔

PULSE POLIO POONCH

ضلع پونچھ مانہ محکمہ صحت نے جاری پلس پولیو ٹیکہ کاری مہم غے دوران کل 80 ہزار 860 بچاں نانہ پولیو غا قطرہ پلا غے، ایک قابل تعریف کم کیو ہے۔ اس موقع ور ڈپٹی چیف میڈیکل افسر پونچھ تے انچارج پلس پولیو ٹیکہ کاری مہم ڈاکٹر روبی بھٹی نے مہم غے تیجے تہاڑے اس کامیابی بارے دسیو تے کہیو کہ یاہ کامیابی محکمہ صحت غی پوری ٹیم غی محنت، لگن تے باہمی تعاون غو نتیجہ ہے۔ آکاشوانی غا خبراں آلا شعبہ سنگ گل کرتا واں ڈاکٹر بھٹی نے اس طرح کہیو۔

NCC R'DAY

میجر جنرل انوپندر بیولی، اے۔ڈی۔جی جموں کشمیر تے لداخ، این۔سی۔سی ڈائریکٹوریٹ نے جموں غا نگروٹہ مانہ واقع این۔سی۔سی اکیڈمی مانہ یوم جمہوریہ 2026 غا دستہ غی تیاریاں غو جائیزو لیو۔ انہاں نے کیڈٹس غا نظم و ضبط، ثقافتی صلاحیت تے محنت غی تعریف کی۔ میجر جنرل نے کیڈٹس غی حوصلہ افزائی کی کہ وہ اپنو معیار برقرار رکھیں تے نوی دلی مانہ ہون آلا یوم جمہوریہ کیمپ مانہ ملک غو ناں روشن کریں۔ اس موقع ور گل کرتا واں میجر جنرل بیولی نے اس طرح کہیو۔

RANA SOLAR POWER

وزیر جل شکتی جاوید احمد رانا نے اج سائنس تے ٹیکنالوجی محکمہ غا سیکرٹری ڈاکٹر شاہد اقبال چودھری غے نال ایک جائیزہ میٹنگ کی جس مانہ ضلع پونچھ مانہ شمسی توانائی غی پیداوار گا امکانات غو جائیزو لیو گیو، تے انہاں نانہ اگے بدھان ور غور کیو گیو۔ میٹنگ مانہ اس گل ور زور دتو گیو کہ پونچھ مانہ شمسی تے دیگر قابل تجدید توانائی غا فروغ واسطے ایک اہم ضلع غا طور ور ترجیح دتی جے کیونجے یوہ علاقو پہاڑی ہے، آبادی بکھری وی ہیں، سرحدی ضلع ہیں تے ات بجلی غی فراہمی مانہ اکثر مشکلات آوے۔ اس دوران شمسی توانائی غا منصوبان واسطے مقامات غی نشاندہی ور تفصیلی گل بات کی گئی، جن مانہ سرکاری زمین، سرکاری تعلیمی اداراں غی چھت تے عوامی سطح غی جگہ شامل ہیں تانجے ضلع مانہ حالات غے مطابق سورج غی روشنی تے موسم تیں فائدو لیو جاسکے۔

PGKO AGRICULTURE

عوامی رسائی غی پهل پرشاسن گراں غی اور مہم غے تحت ضلع رامبن مانہ منعقد کی جارئی ہے جس غو مقصد سرکاری خدمات نانہ براہ راست لوکاں غا کہراں توڑی لے جانوہے تے خاص طور ور دیہی تے دور دراز علاقان مانہ آخری میل خدمات غی فراہمی نانہ مضبوط بنانو ہے مشروم غی کاشت نانہ فروغ دین واسطے محکمہ زراعت نے کیمپ غو انعقاد کیوتے مشروم غی کاشت واسطے سبسڈی، ترتیب، کٹ تے کھاد واسطے مالی مدد فراہم کرے واضع رہ جے تربیت خاص طور ور خواتین تے قبائلی فہراست تے شیڈول کاسٹ کساناں واسطے ہے پرشاسن گراں غی اور غو منصوبو بجلی سطح ور سرکاری سکیمیاں تے خدمات نانہ بغیر کسے پریشانی غے رسائی نانہ یقینی بناتا واں انتظامیہ تے شہریاں غے بشکار دوری نانہ ختم کرنوہے اس بارے رام بن ضلع غازری آفیسر گلدیپ بسن نے اس طرح کہیو۔

PROG ANN

آکاشوانی جموں غو علاقائی خبراں آلو شعبو ، قومی صارفین تہاڑا، 2025 غا موقع ور ایک خصوصی مباحثہ ور 30 منٹ غو پروگرام پیش کرے غو جہیڑو 24 دسمبر 2025 نانہ تہاڑی غا 12 بج غے 30 منٹ ور نشر کیو جے غو۔ اس پروگرام غو موضوع وے غو، آگاہی تیں عملی قدم توڑی، بھارت مانہ صارفین غا حقوق نانہ مضبوط بنانو۔ اس پروگرام مانہ ماری مہمان ویں غی محترمہ بیما چودھری جہڑی جموں کشمیر مانہ صارفین شکایات نانہ حل کرن آلی کمیشن غی رکن ہیں، وہ اس بارے اپنی قیمتی رائے تے ماہرانہ رائے پیش کریں غی۔ پروگرام غی میزبانی کریں غا مارا اینکر وجے بجاج۔ سامعین یوہ پروگرام میڈیم ویو 303 میٹر یعنی 990 کلو ہٹز تے ایف ایم 100 عشریہ 3 میگا ہٹز ور سُن سکیں۔

TAEKWONDO POONCH

صحت نظم و ضبط تے کھیڈا نانہ فروغ دین غا مقصد سنگ ایک قابل ذکر پهل مانہ مرکزی زیر انتظام علاقان گا نوجواناں واسطے ککنگ آوٹ ڈرگ بلڈنگ چیمپین بڑو دو

روزہ ٹاؤنڈو چیمپین شپ غو کامیابی سنگ پونچھ مانہ انعقاد کیو گیوہے تقریب مانہ پورا خطہ توں 3 سو متا باصلاحیت نوجوان کھیڈاریاں نے شرکت کی جہیڑا ٹاؤنڈو غا مختلف زمران مانہ حصو لے رہیا تھا مقامی ٹاؤنڈو کلبان غا تعاون سنگ کھیڈامور تے نوجوان خدمات محکمہ غے زیر اہتمام چیمپین شپ ور دوہری توجہ مرکوز تھی تاہم اس دوران اس غو مقصد نوجواناں مانہ کھیڈاں نانہ فروغ دین تے انہاں نانہ منشیات غا استعمال غا خطرات تیں دور رہن غی ترغیب دینوہے۔

WEATHER

محکمہ موسمیات تے جموں کشمیر مانہ تازہ موسمی صورتحال بارے جانکاری دیتا واں دسیوہے جے آن آلا سات تہاڑاں اندر جموں صوبہ گا میدانی علاقان مانہ درمیانان درجہ توں گنی تھند ہوسکے جد کہ 29 دسمبر توڑی چڑھ رہن تے 30 دسمبر

توں 1 جنوری توڑی میدانى علاقاں مانہ بارش ہوں تے اُچیراں علاقاں مانہ ہلکی
برف باری غی پیشن گوئی کی گئی ہے۔
